

### U ovom broju čitajte:

- UPFBiH organizovalo panel diskusiju na temu Plava knjiga
- X proširena sjednica Upravnog odbora Udruženja poslodavaca FBiH
- ESV: Poslodavci traže ravnopravan tretman javnih i privatnih preduzeća
- Direktor UPFBiH učestvovao na Desetom europskom regionalnom sastanku Međunarodne organizacije rada
- Udruženje poslodavaca FBiH na Četvrtom gospodarskom forumu
- Sastanak predstavnika UPFBiH i Udruge poduzetnika i poslodavaca Žepče
- Poslodavci traže izmjenu člana Zakona o uređenju saobraćaja na području KS koji definiše snabdijevanje poslovnih objekata
- Održana sjednica UO Grupacije poslodavaca za djelatnost metalne industrije
- Riješiti neusklađenost akata kojim se uređuje pitanje deklarisanja proizvoda i navođenje rokova trajanja u FBiH i RS-u
- Sjednica UO Udruženja poslodavaca KS

## Udruženje poslodavaca FBiH organizovalo panel diskusiju na temu Plava knjiga



Udruženje poslodavaca FBiH organizovalo je 27. septembra 2017. godine panel diskusiju na temu „Plava knjiga”, kako bi članice Udruženja direktno, kroz primjedbe i sugestije, učestvovale u kriranju sadržaja i smjernica ovog značajnog dokumenta za ekonomiju Federacije BiH.

Plava knjiga je produkt Ekonomskog savjeta Vlade FBiH, a načinjena je s ciljem utvrđivanja novog modela razvoja (F)BiH, te će poslužiti kao input za pripremu materijala ekonomske politike Vlade FBiH za 2018. godinu.



Vizija Plave knjige je objasniti kako postati zemlja visokog dohotka, stoga jedan od autora prof. Vjekoslav Domljan između ostalog ističe da „ključni sektori razvoja trebaju biti digitalizirana industrija, finansijski sistem i dijaspora koji bi doprinijeli povećanju rasta BDP po dva procentna godišnje. Ključni agenti promjena bi trebali biti lideri lanaca vrijednosti (velika poduzeća), gazele (mala i srednja snažno rastuća poduzeća) te mikro digitalne kompanije”.



Smanjivanjem troškova rada i opterećenja realnog sektora, kao i izjednačavanjem tretmana između javnih i privatnih kompanija, povećao bi se bruto domaći proizvod. Nužno je, rasterećenjem privrede i povećanim oporezivanjem potrošnje i imovine, promijeniti dosadašnju praksu i na taj način omogućiti privrednicima bolje poslovno okruženje, ističe direktor Zavoda za

programiranje razvoja FBiH Ljubiša Đapan.

Tokom diskusije, poslodavci su podržali ciljeve Plave knjige, ali i izrazili bojazan za nedostatak političke volje za realizacijom istih.



Temeljni problem ekonomije (F)BiH je što joj je ključna poluga razvoja i najprestižniji poslodavac javni sektor. Nad malenim i sputanim privatnim sektorom natkrilio se neefikasan i nepravičan javni sektor.

Ekonomski savjet Vlade FBiH i premijer Vlade FBiH će zvanično prezentovati Plavu knjigu početkom oktobra. Poslodavci i druge zainteresovane institucije će imati priliku o knjizi čuti i tokom javnih prezentacija koje će biti upriličene u nekoliko gradova Federacije BiH.

## Zvanično predstavljena Plava knjiga s preporukama za vođenje ekonomске politike

Vijeće stranih investitora i Udruženje poslodavaca FBiH predstavili su 04. oktobra 2017. godine u Sarajevu "Plavu knjigu" s preporukama za vođenje ekonomске politike.

Premijer FBiH Fadil Novalić rekao je da radovi poput te knjige omogućavaju da, uz učešće svih relevantnih faktora u društvu, trasiramo novi put Bosne i Hercegovine koji će uključivati mnogo više gledišta, a ne samo stranačke programe koji budu pretočeni u program Vlade.

- Ovo je zaista novina i izuzetan događaj gdje na jednom mjestu imamo i Vijeće stranih investitora, Udruženje poslodavaca, akademsku zajednicu i Vladu i taj polivalentan rad trebao bi rezultirati novim pravcima za BiH



- istakao je Novalić.

Predsjednik Vijeća stranih investitora Branimir Muidža naveo je da je oko 60 njihovih stručnjaka učestvovalo u izradi "Plave knjige" i da očekuju da sve vlade u BiH pristupe realizaciji njihovih preporuka.



Predsjednik Ekonomskog savjeta Vlade FBiH Vjekoslav Domljan naglasio je da BiH mora promijeniti čitav koncept razvoja da bi postala zemlja visokog dohotka, što mora biti preokupacija naše politike.



- Sadašnji model rasta, koji nam je omogućio da od zemlje niskog dohotka dođemo do zemlje višeg srednjeg dohotka, ne možemo

primijeniti na put od zemlje srednjeg do zemlje visokog dohotka. Za to su važna ulaganja u istraživanje, infrastruktura i fiskalna devalvacija - smatra Domljan.



Predsjednik Udruženja poslodavaca FBiH Adnan Smailbegović kazao je da su reforme bolne i da ne mogu nikako svima odgovarati jer će neko biti na dobitku, a neko oštećen, ali da je potrebno gledati ukupan ambijent.



Predsjednik Udruženja poslodavaca FBiH Adnan Smailbegović kazao je da su reforme bolne i da ne mogu nikako svima odgovarati jer će neko biti na dobitku, a neko oštećen, ali da je potrebno gledati ukupan ambijent.

## Održana X proširena sjednica Upravnog odbora Udruženja poslodavaca FBiH

U Hotelu Bosnia u Sarajevu 10. oktobra 2017. godine održana je X proširena sjednica Upravnog odbora Udruženja poslodavaca FBiH sa sljedećim Dnevnim redom:

1. Usvajanje Zapisnika sa IX proširene sjednice UO

2. Razmatranje materijala za sjednicu ESV-a

2.1. Nacrt zakona o zaštiti na radu

2.2. Nacrt zakona o mirnom rješavanju radnih sporova

2.3. Nacrt zakona o koncesijama

2.4. Prednacrt zakona o ugostiteljstvu FBiH

2.5. Uredba o postupku vanrednog nadzora u prirednim društvima od sistemskog značaja za FBiH

3. Razmatranje inicijative EZ d.o.o. Busovača vezano za zabranu planisaranja hemijskih proizvoda iz FBiH u RS

4. Potvrđivanje Odluke Izvršnog odbora o obilježavanju Dana poslodavaca i ustanovljavanju nagrade „Emerika Bluma“

5. Potvrđivanje Odluke Izvršnog odbora o kupovini poslovnog prostora i kreditnom zaduženju za djelimično finansiranje kupovine istog

6. Potvrđivanje Odluke Izvršnog odbora o pokretanju inicijative za izmjene Općeg kolektivnog Ugovora za teritoriju FBiH

7. Potvrđivanje Odluke Izvršnog odbora o imenovanju pregovaračkog tima za vođenje pregovora i zaključivanje izmjena i dopuna Općeg kolektivnog Ugovora za teritoriju FBiH

8. Tekuća pitanja



### Nacrt Zakona o zaštiti na radu

Udruženje poslodavaca FBiH je aktivno učestvovalo u izradi Nacrta zakona o zaštiti na radu. Krajem 2015. godine formirana je i Radna grupa u kojoj su učestvovali socijalni partneri, te je tom prilikom Udruženje uložilo

primjedbe, a određene su bile i uključene u tekst Nacrta zakona.

Zbog onih primjedbi koje socijalni partneri nisu uspjeli usaglasiti, ESV je početkom 2016. godine donijelo zaključak da socijalni partneri održe sastanak na kojem će usaglasiti primjedbe kako bi bile ugrađene u tekst Nacrta zakona.

Socijalni partneri su 09.03.2016 godine potpisali Sporazum o usaglašenim primjedbama, te je spomenuti sporazum sa usaglašenim primjedbama dostavljen Ministarstvu za rad i socijalnu politiku FBiH 17.03.2016. godine. Primjedbe su ugrađene u Nacrt zakona o zaštiti na radu. Takav tekst Nacrta podržan je od strane Ekonomsko socijalnog vijeća i data je saglasnost da se uputi u parlamentarnu proceduru.

Međutim, posljednja verzija iz septembra 2017. godine, bez saglasnosti socijalnih partnera, je pretrpjela promjene i određena rješenja u novom tekstu Nacrta su u suprotnosti sa odredbama koje su uskladili socijalni partneri i koje je podržalo Ekonomsko socijalno vijeće za teritoriju FBiH.

Na ovaj način se šalje poruka da je socijalni dijalog u FBiH na veoma niskom nivou. Sporazumi socijalnih partnera se ne poštuju, a mišljenja ne uvažavaju. Vlada FBiH u cilju podrške socijalnom dijalogu treba uvažavati

sporazume socijalnih partnera i stoga Udruženje predlaže da se usvoje amandmani koji su proizvod kompromisa socijalnih partnera.

Najnoviji tekst Nacrta zakona ne sadrži odredbe o kojima su socijalni partneri postigli dogovor, a tiču se članova 23., 33., 44., 45. i 59.

Posebno treba istaći član 44. koji definiše ko može biti povjerenik zaštite na radu. Udruženje smatra da povjerenik ne može biti sindikat nego osoba koju izaberu radnici, a takvo rješenje je podržao i Sindikat. Međutim, u najnovijem tekstu Nacrta ponovno se uvodi da je povjerenik zaštite na radu sindikat, što je suprotno dogovoru između Sindikata i Udruženja poslodavaca FBiH. Također ista situacija je i u članu 45. kojim je definisano da povjerenik ima nakandu plaće u visini kao da je radio. Ovakvo rješenje je također u suprotnosti sa dogовором socijalnih partnera.

### **Nacrt Zakona o mirnom rješavanju radnih sporova**

Udruženje poslodavaca FBiH podržava donošenje Nacrta zakona u predloženoj formi uz primjedbe koje su tehničke prirode.

### **Nacrt Zakona o koncesijama**

UPFBiH smatra da Nacrt zakona ima i formalne i suštinske nedostatke, te da nije u potpunosti

usaglašen sa normama Evropske unije iz ove oblasti i te da je suprotan odredbama Evropske povelje o lokalnoj samoupravi.

Generalne primjedbe:

- Nacrt zakona nije uveo lokalnu samoupravu u sistem koncesija što je u suprotnosti sa Zakonom o principima lokalne samouprave u FBiH (općinama/gradovima je u potpunosti uskraćeno pravo da bude potencijalni koncesor). Ovakvo rješenje je protivno i odredbama Evropske povelje o lokalnoj samoupravi.
- Općinska/Gradska vijeća moraju dati saglasnost a ne mišljenja za uspostavljanje koncesionog odnosa na onim resursima koji su na teritoriji jedinice lokalne samouprave.
- Razgraničiti predmete koncesije na obnovljive i neobnovljive te u skladu s tim utvrditi visinu koncesione naknade.
- Tačno definisati rok za korištenje koncesionih dobara gdje se mora voditi računa o amortizaciji uloženih sredstava.
- Potrebno je tačno definisati upravni inspekcijski nadzor kao i druga pitanja od značaja za dodjelu koncesije.
- Ponuđeni Nacrt zakona nije usklađen sa mnogim zakonima koji su u direktnoj vezi sa koncesijama kao što su Zakon o javnim nabavkama, Zakon o bankama, Zakon o stvarnim pravima, Okvirni zakon o zalozima

BiH.

- Posebno je naglašena nedorečenost, nedovoljna preciznost pojedinih odredbi, pa se nameće pitanje u kojoj bi mjeri eventualni podzakonski akti uopće uspjeli precizirati detalje koji nisu obrađeni u samom Zakonu, te koliko bi to doprinijelo efikasnom provođenju regulative i odvijanju procesa u oblasti koncesija.
- Zakonom se mora precizno i jasno definisati status postojećih ugovora o koncesijama u momentu stupanja na snagu ovog zakona. Predloženom odredbom Zakona ostaje nejasno na koje ugovore se odnosi te da li je zagarantovano da će koncesionari i dalje dobiti postojeće koncesije.
- Potrebno je Zakonom definisati odgovornost koncesora u pogledu uvođenja Koncesionara u posjed u vremenskom perioda korištenja koncesije.

S obzirom na važnost koncesije za poslodavce, Udruženje smatra da se navedene primjedbe trebaju detaljno razmotriti i ugraditi u konačan tekst Zakona.

### **Prednacrt zakona o ugostiteljstvu Federacije BiH**

Udruženje smatra da predložena odredba u stavu 4. Prednacrta zakona da konobar i recepcionar ima najmanju SSS ugostiteljskog

smjera ili SSS i položen stručni ispit je poželjna ali sasvim nerealna na trenutnom tržištu rada. Uzimajući u obzir tržište rada, nerealno je i u praksi teško izvodivo da konobari i recepcioneri imaju položen stručni ispit za konobara, odnosno recepcionera. Budući da je jedan od razloga za donošenje novog zakona smanjenje sive ekonomije u FBiH, stav. 4. je neophodno izmijeniti u smislu da konobari i recepcioneri imaju najmanje srednju stručnu spremu, a da konobari i recepcioneri u ugostiteljskim objektima u stavu 2. i 3. da poznaju najmanje jedan strani jezik i da ispunjavaju određene zdravstvene uslove.

Također, predložena odredba u stavu 1. tačka h prema kojoj je ugostitelj dužan da u svakom ugostiteljskom objektu drži, te tačno i ažurno vodi poslovnu knjigu sa pratećim evidencijama o nabavci robe i repro-materijala koji se koriste u svrhu pružanja ugostiteljskih usluga, sa posebnim dokazima o porijeklu robe je sasvim neopravdana. Vođenje poslovnih knjiga regulisano je Zakonom o računovodstvu i reviziji u FBiH, stoga treba uputiti na ovaj zakon.

Primjedbe Udruženja na ovaj prednacrt zakona prezentovane su na sjednici ESV-a.

### **Uredba o postupku vanrednog nadzora u privrednim društvima od sistemskog značaja za Federaciju BiH**

Udruženje je dalo saglasnost na Uredbu uz primjedbe koje se odnose na mjere pojačanog nadzora, odnosno Udruženje predlaže da se uvrsti u član zabrana raspolaganja imovinom društva i imovinom povezanih društava osim uz prethodno pribavljenu saglasnost povjerenika, te da se rok važenja primjedbe, te da se primjenjivanje uredbe, do donošenja odgovarajućeg zakona, produži sa 90 dana na 12 mjeseci.

Primjedbe su prezentovane na sjednici Ekonomsko-socijalnog vijeća FBiH.

### **Stav UPFBiH o subvencioniranju radnika državnih preduzeća za odlazak u penziju**

Udruženje poslodavaca Federacije Bosne i Hercegovine upozorava na neravnopravan tretman javnih i privatnih preduzeća od strane institucija vlasti u BiH i FBiH, a na štetu privatnih kompanija i poslodavaca.

Povod za ovakav stav Udruženja je ponovljeni Javni poziv Vlade FBiH za kandidovanje programa utroška preostalih sredstava utvrđenih u razdjelu 17. Budžeta FBiH za 2017. godinu u Federalnom ministarstvu energije, rudarstva i industrije „tekući transferi i drugi tekući rashodi – subvencije javnim preduzećima za uplatu doprinosa za PIO/MIO u svrhu penzionisanja zaposlenika".

Međutim neravnopravan tretman privatnih

kompanija u odnosu na državne nije samo kod objavljanja javnog poziva, već neravnopravnost je uočen i u tolerisanju neplaćanja poreza i doprinosa, ne pokretanju stečajnog postupka, učešću na tenderima visini plata za isti ili približno isti rad i slično.

UPFBiH traži da se sistemski riješi pitanje dugovanja javnih preduzeća, omogući ravnopravan tretman državnih i privatnih preduzeća pri naplati poreza i doprinosa, provođenju kontrolnih mjera inspekcijskog i drugog nadzora, primjena Zakona o stečaju i slično.

Stav UO UPFBiH je prezentiran na sjednici ESV-a.

### **Razmatranje Inicijative EZ d.o.o. Busovača vezano za zabranu plasiranja hemijskih proizvoda iz FBiH u RS**

Krajem prošle godine, Udruženje poslodavaca FBiH je pozvalo Vladu FBiH i delegaciju EU u BiH na rješavanje problema plasmana hemijskih proizvoda iz FBiH u RS.

Udruženje je dobilo obećanje iz više nadležnih institucija da će se poduzeti odgovarajući koraci kako bi se omogućio pristup tržištu RS-a i to kroz donošenje odgovarajućih zakona i kroz pregovore sa Vladom RS-a. Također, premijer Novalić je sjednici Vlade FBiH u oktobru 2016. godine tražio od Federalnog

ministarstva zdravstva da hitno predloži nacrt Zakona o hemikalijama koji bi urgentno uputio u Parlament FBiH na usvajanje. Međutim, poslodavci su posljednjih mjeseci ponovno izloženi pritiscima od strane privrednih subjekata iz RS-a jer se zahtjeva od privrednika iz FBiH da u najkraćem mogućem roku dostave upis u registar hemikalija RS, te ako to nisu u mogućnosti ispuniti, morat će cjelokupan assortiman povući sa polica. Na ovaj način se onemogućuje nesmetan tok roba i kapitala između FBiH i RS-a, a proizvođači iz FBiH se dovode u nepovoljan i diskriminirajući položaj.

Na sjednici je zaključeno da će Udruženje uputiti dopis prema Vladi FBiH i inspekcijama sa zahtjevom da se se traži da se po ovom pitanju poštuje princip reciprociteta. Također dopis će se uputiti i Evropskoj delegaciji.

### **Ostale tačke Dnevnog reda**

Upravni odbor je potvrdio odluke Izvršnog odbora UPFBiH o obilježavanju Dana poslodavaca i ustanovljavanju nagrade „Emerika Bluma“, o kupovini poslovnog prostora i kreditnom zaduženju za djelimično finansiranje kupovine istog, o pokretanju inicijative za izmjene Općeg kolektivnog Ugovora za teritoriju FBiH, kao i odluku o imenovanju pregovaračkog tima za vođenje pregovora i zaključivanje izmjena i dopuna Općeg kolektivnog Ugovora za teritoriju FBiH.

## ESV: Poslodavci traže ravnopravan tretman javnih i privatnih preduzeća

Na sjednici Ekonomsko-socijalnog vijeća za teritoriju Federacije BiH 10. oktobra 2017. godine poslodavci i sindikalisti zaključili su da je potrebno dodatno usaglasiti odredbe Nacrta zakona o zaštiti na radu, čije je donošenje predložila Vlada FBiH u okviru reforme radnog zakonodavstva budući da je postojeći Zakon o zaštiti na radu donesen 1990. godine.

Navodeći razlog za takav stav, predstavnici Udruženja poslodavaca FBiH i Saveza samostalnih sindikata BiH kazali su da ne mogu prihvati navedeni Nacrt zakona o zaštiti na radu, već onaj raniji tekst zakon koji su usaglasili socijalni partneri.



- Prilikom razmatranja prvobitnog prijedloga navedenog zakonskog rješenja na jednoj od ranije održanih sjednica ESVFBiH nije postignuta saglasnost oko 12, 13 članova i zaključak je bio da delegacije poslodavaca i

sindikata formiraju pregovaračke timove, koji će usuglasiti navedene članove, "a ono što ne bude da usaglasi Vlada FBiH". Međutim sve je usagrašeno te podržavamo usagrašeni tekst zakona, a ovu verziju koja je danas ponuđena ne možemo podržati - rekao je direktor Udruženja poslodavaca FBiH Mladen Pandurević.

Predsjednik Saveza samostalnih sindikata BiH Ismet Bajramović naglasio je da se do kraja treba regulisati posebno "način kako da se postupa prema radnicima koji dožive povredu na radu".

Federalni ministar rada i socijalne politike Vesko Drljača istakao je da je za predloženi tekst Nacrta zakona o radu u međuvremenu stiglo više od 50 amandmana nadležnih ministarstva zdravstva, kantona i drugih resornih institucija.

Glavni cilj novog zakona je, kako kaže, stvoriti uvjete, koji u najvećoj mogućoj mjeri smanjuju rizike od povreda na radu, profesionalnih i oboljenja vezanih za rad.

Novi zakon predlaže osnivanje vijeća za sigurnost i zdravlje na radu na federalnom nivou, u kojem će predstavnici sindikata,

poslodavaca, Vlade i eksperata iz radnih odnosa davati prijedloge i sugestije, prevenirati mogućnosti nastanka povreda i šteta na radu.

- Također, zakon omogućava sindikatu sudjelovanje u unapređenju sigurnosti zdravlja na radu, a poslodavcima nalaže obaveze osiguranja preventivnih mjera, sredstava i opreme osobne zaštite, obavezu upoznavanja o propisima iz oblasti sigurnosti na radu i obvezno osiguranje radnog mjesta stručnog suradnika za sigurnost i zdravlje na radu - dodao je Drljača.

Također, duža rasprava na sjednici je vođena prilikom razmatranja stava Udruženja poslodavaca FBiH o subvencioniranju radnika državnih preduzeća za odlazak u penziju.

doprinosa, nepokretanju stečajnog postupka, učešću na tenderima, visini plata za isti ili približno isti rad i slično - kazao je predsjednik Upravnog odbora Udruženja poslodavaca FBiH Adnan Smailbegović.

Ministar energije, rudarstva i industrije Nermin Džindić kazao je kako je činjenica da broj privatnih preduzeća koja imaju probleme raste, ali da je novac za rješavanje problema planiran i za javna i za privatna preduzeća.

- Za javna i privatna preduzeća u ovoj godini planirali smo milion i po KM - konstatovao je resorni ministar Nermin Džindić.

Premijer Fadil Novalić istakao je da se tim novcem čisti uglavnom ono što više neće biti na tržištu.

Osim navedenog, socijalni partneri podržali su usvajanje Uredbe o postupku vanrednog nadzora u privrednim društvima od sistemskog značaja za Federaciju, ističući da se ta uredba treba odnositi ne samo na „Agrokor“ već i za druge slične slučajeve. Jedini kriterij, sugerisali su, treba biti ostvaren prihod firme, a ne broj radnika.

Također, podržan je i Nacrt zakona o mirnom rješavanju radnih sporova, te Prednacrt zakona o ugostiteljstvu FBiH.



- Upozoravamo na neravnopravan tretman javnih i privatnih preduzeća od strane institucija vlasti u BiH i FBiH a na štetu privatnih kompanija i poslodavaca, a što se ogleda u tolerisanju neplaćanja poreza i

## Direktor UPFBiH učestvovao na Desetom europskom regionalnom sastanku Međunarodne organizacije rada



Na poziv generalnog direktora Međunarodne organizacije rada (ILO) Guya Rydera, direktor Udruženja poslodavaca FBiH Mladen Pandurević učestvovao je na Desetom europskom regionalnom sastanku IOL-a u Istanbulu, koji se održao od 02. do 05. oktobra 2017. godine u Republici Turskoj.

Skup se održava svake četiri godine i okuplja predstavnike nacionalnih vlada, poslodavaca i radnika iz 51 države regije, a teme ovogodišnjeg sastanka su pitanja pristupa tržištu rada za radnike migrante, azilante i izbjeglice, te zaštita radnika i uloga socijalne politike u upravljanju multinacionalnim kompanijama.

U okviru izvještaja koji je predstavio generalni direktor ILO-a, Deseti regionalni sastanak ILO-a fokusirao se i na budućnost dostojanstvenog

rada u Evropi i Centralnoj Aziji. Između ostalog, na sastancima se raspravljalo i o politikama ekonomskog i socijalnog razvoja, postignućima i iskustvima stečenih od Devetog europskog regionalnog sastanka održanog 2013. godine u Norveškoj, kao i o međunarodnim standardima rada, socijalnom dijalu i rodnoj ravnopravnosti.

## Riješiti neusklađenost akata kojim se uređuje pitanje deklarisanja proizvoda i navođenje rokova trajanja u FBiH i RS-u

U prostorijama UPFBiH 18. oktobra 2017. godine održan je sastanak vezano za nepostojanje zakonskih i podzakonskih akata na nivou Federacije BiH kojim se na jasan način uređuje pitanje deklarisanja kozmetičkih proizvoda i navođenje rokova trajanja.



Izuvez predstavnika Udruženja, sastanku su prisustvovali predstavnici dm-a, Binga, Ataca i Mepasa, te glavni entitetski zdravstveni inspektor i predstavnici Ministarstva vanjske trgovine i ekonomskih odnosa BiH i Ministarstva zdravstva FBiH.

Osnovni problem je neusklađenost entitetskih zakonskih i podzakonskih akata. Naime, u Federaciji BiH još uvijek su na snazi Zakon o zaštiti potrošača u Bosni i Hercegovini i Zakon o zdravstvenoj ispravnosti životnih namirnica i predmeta opće upotrebe koji su preuzeti iz zakonodavstva SFRJ, a u Republici Srpskoj su Zakon o zaštiti potrošača u RS-u, Zakon o

predmetima opšte upotrebe i Pravilnik o bezbjednosti predmeta široke potrošnje usklađeni sa Uredbom Europskog parlamenta i Vijeća Europe o kozmetičkim proizvodima, koji na jasan način definišu pitanje navođenja rokova trajanja na proizvodima.

Neusklađenost propisa primorala je poslodavce da proizvode u dva entiteta deklarišu različito, jer način na koji se deklarišu proizvodi u FBiH nije prihvacen od strane inspekcijskih organa na području RS-a i obratno, a zbog čega se kompanije susreću sa velikim problemima i gubicima.

Neke od kompanija su vodile i sudske sporove zbog različitog tumačenja zakonskih propisa, što iziskuje dodatne sudske troškove.

Neophodno je pristupiti donošenju akata na nivou Federacije BiH, istakli su predstavnici nadležnih institucija, kako bi se onemogućilo proizvoljno tumačenje.

UPFBiH će na narednoj sjednici Ekonomsko-socijalnog vijeća FBiH delegirati ovo pitanje, te će zatražiti od Vlade FBiH donošenje uredbe koja bi riješila problem deklarisanja proizvoda i isticanja roka trajanja, a koja bi bila na snazi do donošenja novog zakona.

## Sjednica UO Udruženja poslodavaca KS i Komisije za organizaciju IV izborne Skupštine UPKS

S ciljem rješavanja problema poslodavaca u Kantonu Sarajevo 17. oktobra 2017. godine održana je sjednica Upravnog odbora Udruženja poslodavaca Kantona Sarajevo i sjednica Komisije za organizaciju IV izborne Skupštine UPKS. Sjednici su prisustvovali članovi UO: Muhamed Pilav, Igor Baroš, Miralem Šabović, Enver Malagić, Safudin Čengić i Nijaz Skenderagić. Izuzev članova UO, sjednici su prisustvovali i direktor Udruženja poslodavaca FBiH Mladen Pandurević i vlasnik kompanije Praktik d.o.o. iz Sarajeva Muhamed Žero.



Na sjednici je razmatrana inicijativa kompanije Praktik u vezi sa primjedbama poslodavaca iz Sarajeva na Zakon o komunalnim djelatnostima KS. Naime, poslodavci iz ovog kantona izražavaju nezadovoljstvo određenim odredbama Zakona, te su pokrenuli inicijativu za izmjenu pomenutog zakona.

Glavne primjedbe se odnose na dio Zakona - Poglavlje III – Osnove i mjerila za određivanje komunalne naknade, utvrđuje se način i visina naknade za odvoz smeća iz preduzeća. Primjenom ovih odredbi poslodavci iz KS-a smatraju da su višestruko oštećeni. Kako navode:

- Naknada se utvrđuje po m<sup>2</sup> proizvodnog prostora, magacina I drugo
- Ovim je naknada za odvoz smeća iz firmi povećana i do deset puta
- Na ovaj način je usluga koju vrši KJP RAD kategorisana kao porez a ne kao usluga
- Sve firme iz metaloprerađivačke i drvne djelatnosti prodaju ili koriste svoj otpad!

Poslodavci smatraju da je jedino ispravno rješenje plaćati naknadu po količini, odnosno, zapremini odvoza smeća ili težini odvezenog smeća.

Zaključeno je da će postojeće primjedbe usaglasiti Stručna služba Udruženja poslodavaca FBiH, te da će se konačna verzija uputiti Ekonomsko-socijalnom vijeću Kantona Sarajevo.

Više o inicijativi možete pročitati [OVDJE](#).

Nadalje, članovi UO raspravljali su o inicijativi

kompanije Grizelj d.o.o. u vezi Zahtjeva za ukidanje Odluke o zaštiti i poboljšanju kvaliteta zraka u Kantonu Sarajevo. Poslodavci smatraju da je Odluku potrebno ukinuti jer je nejasna, neprecizana i neprovodiva u praksi, te ne unapređuje kvalitet zraka u KS, a nasuprot tome, nameće dodatne nepotrebne parafiskalne namete poslodavcima.

Obavezuje se Stručna služba Udruženja poslodavaca FBiH da pripremi amandmane na Odluku o zaštiti i poboljšanju kvaliteta zraka u KS.

Nakon pripremljenih amandmana potrebno je organizovati sastanak sa predstavnicima Udruženja poslodavaca KS i Ministarstva prostornog uređenja i zaštite okoliša KS, kako bi zajednički sagledali mogućnosti donošenja

izmjena i dopuna predmetne odluke.

Više o inicijativi možete pročitati [OVDJE](#).



Nadalje, na sjednici su članovi Komisije za organizaciju IV izborne Skupštine Udruženja poslodavaca KS sa direktorom Udruženja poslodavaca FBiH izvršili selekciju članova Upravnog odbora za izbornu Skupštinu, te će se članovi birati u skladu sa Statutom Udruženja poslodavaca Kantona Sarajevo.

## Sastanak direktora UPFBiH i predstavnika Grupacije iz oblasti finansija pri UPFBiH

Direktor Udruženja poslodavaca FBiH Mladen Pandurević održao je 13. oktobra 2017. godine sastanak sa predstavnikom Grupacije iz oblasti finansijskog poslovanja pri UPFBiH Ivanom Luburićem.

Grupacija poslodavaca iz oblasti finansijskog poslovanja osnovana je 05. novembra 2012. godine, a svog predstavnika u delegaciji poslodavaca ima i u Ekonomsko-socijalnom

vijeću FBiH.

Jedna od tema sastanka je bila definisanje ciljeva i načina djelovanja Grupacije i unapređenje saradnje. Zaključeno je da postoji dobra osnova za unapređenje saradnje i zajedničko djelovanje, ali i potreba za boljom komunikacijom i razmjenom informacija i iskustava između Udruženja i Grupacije.

## **Poslodavci traže izmjenu člana Zakona o uređenju saobraćaja na području KS koji definiše snabdijevanje poslovnih objekata**

Na posljednjoj sjednici Upravnog odbora Udruženja poslodavaca FBiH delegirano je pitanje vezano za Zakon o uređenju saobraćaja na području Kantona Sarajevo, odnosno njegov uticaj na rad prehrambene industrije.



Član 40., stavka 1. pomenutog zakona glasi:  
„Snabdijevanje poslovnih objekata koji se nalaze uz saobraćajnice vrši se od sedam sati za tekući dan za sve objekte koji nemaju obezbjeđen poseban prostor namjenjen za zaustavljanje dostavnih vozila".

Ovom odredbom Zakona ugrožena je profitabilnost i konkurentnost proizvođača/dostavljača, jer mnoge kompanije i dostavljači nisu u mogućnosti dostaviti robu do

naznačenog vremena, što za posljudicu može imati pad prometa i pad privredne aktivnosti. Izvršioci zakona kažnjvaju dostavljače koji poslije naznačenog vremena dostavljaju robu, što ponovo proizvodi gubitke kompanijama.

Uredba je neprovodljiva jer mnogim firmama, niti dobavljačima radno vrijeme ne počinje prije sedam sati ujutro, a nije uređeno ni pitanje hitne dostave, te su poslodavci mišljenja da je potrebno ili brisati stav 1. pomenutog zakona ili ga prilagoditi realnim mogućnostima za dostavu robe od strane proizvođača/dostavljača.

Udruženje poslodavaca FBiH će ovo pitanje uputiti nadležnim kantonalnim institucijama.

## **Udruženje poslodavaca FBiH na Četvrtom gospodarskom forumu - susret predstavnika vlasti i privrednika iz BiH, Srbije, Hrvatske i Crne Gore koji traže povoljnije poslovno okruženje**



Šta znači biti "business friendly", bila je jedna od tema 4. Gospodarskog foruma općine Žepče, održanog 12. oktobra 2017. godine. Organizatori skupa su Razvojna agencija Žepče i Općina Žepče zajedno sa partnerskim organizacijama CRS i NALED – Nacionalna alijansa za lokalni ekonomski razvoj.

Forum je bio posvećen temi "Ja sam business friendly, a ti?" s fokusom na tri važna segmenta, a to su uloga jedinica lokalne samouprave u razvoju konkurentnosti regija, akt o malim poduzećima (SBA) – odgovor na sve veću depopulaciju, ali i šta danas znači biti business friendly.

Na stručnom skupu učestvovali su predstavnici udruženja poslodavaca, međunarodnih organizacija, institucija vlasti, privrednih

komora, općina i gradova i drugi relevantni sugovornici iz Bosne i Hercegovine, Hrvatske, Srbije i Crne Gore koji traže rješenja za stvaranje povoljnijeg poslovnog okruženje u zemljama regije.

Branka Janko, direktorka agencije RAŽ, kaže da je namjera ovog foruma da se na jednom mjestu okupe ljudi koji su direktno uključeni u biznis i stvaranje istog.



"Forum je prilika da se ukaže na značaj business friendly okruženja, a općina Žepče je više nego dobar primjer uspješnog BFC certifikata koji svoje iskustvo želi prenijeti i izvan granica naše zemlje. Današnjom temom smo htjeli da kažemo da lokalne samouprave i gradovi moraju biti prijatelji biznisu", rekla je Janko.

Na jednom od panela razgovarano je i o Aktu o malom biznisu – SBA.

„Ovaj akt je jedan od ključnih za stvaranje povoljnog poslovnog okruženja u FBiH i za njen razvoj. To je sveobuhvatni okvir politika koje države trebaju donositi i razvijati kako bi se poboljšala poduzetnička klima te omogućio brži rast i razvoj malih i srednjih poduzeća, te samim time poboljšalo investiranje, ulaganje i zapošljivost radne snage“, istakao je koordinator za SBA Ministarstva razvoja, poduzetništva i obrta Adis Faktić

Vlade FBiH niti jedan zakon ili drugi zakonski akti nije usvojen, a da nije imalo novo opterećenje za poslodavce“, istekao je Pandurević.



Učesnici su bili složni u zaključku da uspješna lokalna zajednica čini društvo konkurentnim, ali da je neophodna spremnost vlada da olakšaju poslovanje i stvore uvjete za stvaranje novih i razvoj postojećih poduzeća.



Međutim, direktor Udruženje poslodavaca FBiH Mladen Pandurević ističe da, iako u FBiH postoje pozitivne strane poslovnog ambijenta, dominiraju negativne koje djeluju destimulativno na investitore.

„Komplikovano ustavno uređenje, način donošenja odluka, političke, nacionalne i ostale podjele, visoki porezi i drugi nameti, samo su neki od razloga koji odbijaju investitore. Na primjer, za madata aktuelne

## **Održan sastanak predstavnika Udruženja poslodavaca FBiH i Udruge poduzetnika i poslodavaca Žepče**



Predstavnici Udruženja poslodavaca FBiH 12.10.2017. godine održali su sastanak sa predstavnicima Udruge poduzetnika i poslodavaca Žepče, kolektivnom članicom Udruženja. Teme sastanka su bile dešavanja u ZE-DO kantonu između poslodavaca i učešće Udruženja u projektu UPIP-a.

Direktor Udruženja Mladen Pandurević izrazio je nezadovoljstvo trenutnim stanjem u Zeničko-Dobojskom kantonu kada su u pitanju međusobni odnosi između članova udruženja poslodavaca sa tog kantona i komunikacija između privrednika i udruženja. Istakao je da je neprihvatljivo da međusobni odnosi stanu na put rješavanju problema od krucijalne važnosti za privrednike i zajedničkog djelovanja na izmjene zakonskih rješenja, te pozvao na poboljšanje komunikacije i hitno rješavanje situacije.

Nadalje, direktor Udruženja upoznao je prisutne o aktivnostima UPFBiH. Jedna o aktivnosti je i održavanje javnih rasprava o Zakonu o porezu na dohodak, Zakonu o doprinosima i Zakonu o porezu na dobit koje će se održati u deset gradova FBiH, a u Zenici će se održati 31. oktobra. Važnost javnih rasprava proističe iz potrebe da se ukaže na važnost donošenja optimalno prihvatljivih zakona koji neće dovoditi u neravnopravniji položaj privrednike u FBiH u odnosu na privrednike iz RS-a i BD BiH.

Predsjednik UPIP-a Marko Lovrić istakao je da poslovno okruženje u FBiH nikada nije bilo gore. Zakonska rješenja koje Vlada donosi su neodgovarajuća i absurdna, kazao je i Lovrić, te dodao da privredni subjekti zajednički trebaju insistirati na izmjeni istih.

Jedno od rješenja za poboljšanje privrede je i socijalno poduzetništvo, kaže izvršna direktorica UPIP-a Mira Jović te poručuje da UPIP priprema projekt koji bi bio svojevrsna priprema za donošenje zakona o socijalnom poduzetništu. Direktor Udruženja poslodavaca FBiH je prihvatio da Udruženje bude partner na projektu, uz definisanje jasnih aktivnosti na kojima bi Udruženje radilo.

## Predstavljen projekat "Moj proizvod"

Projekt "Moj proizvod" pokrenut je u februaru 2015. godine, u suradnji sa Udruženjem poslodavaca FBiH i Vanjskotrgovinskom komorom BiH i od tada do danas predstavljeno je 150 bh. kompanija.



Svečana manifestacija projekta Dnevnog lista "Moj proizvod", 28. septembra 2017. godine je upriličena u hotelu Mepas, u nazočnosti brojnih uzvanika iz privrednog sektora, kao i političkog života. Projekt "Moj proizvod" pokrenut je u februaru 2015. godine, u suradnji sa Udruženjem poslodavaca FBiH i Vanjskotrgovinskom komorom BiH i od tada do danas predstavljeno je 150 bh. kompanija, s ciljem prezentacije bolje, pozitivnije i ljepše strane BiH koja je fokusirana na privredni rast i razvoj.

Sudionicima i partnerima projekta uručene su zahvalnice.

"Cilj nam je da bh javnost informiramo da postoje poduzeća koja pozitivno posluju u našoj zemlji i da nije sve tako sivo i crno u Bosni i Hercegovini. Aktivnosti Projekta se realiziraju kroz dnevnu novinu Dnevni list, gdje se svakog četvrtka na stranicama novine predstavlja bh. privredni sektor", kazala je Selma Dandić, voditeljica Projekta.



Udruženje poslodavaca FBiH je od ove godine partner Dnevnog lista na projektu "Moj proizvod". Direktor UPFBiH Mladen Pandurević kazao je kako Udruženje ima zadovoljstvo biti partner na jednom ovakovom projektu.

„Definitivno, najpozitivnije stvari koje se dešavaju u svim društvenim skupinama BiH vezane su za privredu. Ovo je izvanredna prilika za sve kompanije u BiH i drag mi je što smo partner na ovakovom izvrsnom projektu“, kazao je Pandurević.



Bruno Bojić, predsjednik Vanjskotrgovinske komore BiH, zahvalio se Dnevnom listu na

pozivu za ovaj Projekt te istaknuo kako će Komora cijelo vrijeme biti uz Dnevni list, u vidu podrške.

"Predstavili smo 150 kompanija na način prikazivanja njihovih proizvoda te što je sve urađeno kako bi njihovi proizvodi bili reprezent, ne samo privrede BiH, već i diljem svijeta", kazao je Bojić.

## Održana sjednica UO Grupacije poslodavaca za djelatnost metalne industrije

U prostorijama Udruženja poslodavaca FBiH 05. oktobra 2017. godine održana je II sjednica UO Grupacije poslodavaca za djelatnost metalne industrije pri Udruženju poslodavaca FBiH sa sljedećim Dnevnim redom:

1. Razrješenje predsjednika UO i imenovanje novog predsjednika UO Grupacije;
2. Razrješenje potpredsjednika UO i imenovanje novog potpredsjednika UO Grupacije;
3. Razmatranje Prijedloga sporazuma o produženju KU za djelatnost metalne industrije Sindikata metalaca FBiH i zauzimanje stavova Grupacije vezano za KU za djelatnost metalne industrije;
4. Informacija o Zakonu o porezu na dohodak i Zakona o doprinosima;
5. Tekuća pitanja.

Na sjednici je imenovana Snježana Dropuljić iz Aluminija Mostar za novu predsjednicu Upravnog odbora Grupacije i Sonja Šarevska iz ArcelorMittala za novu potpredsjednicu UO.

Članovi UO, u skladu sa Dnevnim redom, zauzeli su stav o Kolektivnom ugovoru za djelatnost metalne industrije.

Na sjednici je Stručna služba UPFBiH informisala članove UO Grupacije o aktivnostima Udruženja u vezi sa nacrtima zakona o dohotku i doprinosima. Članovi UO su također istakli gorući problem zloupotrebe bolovanja, te poručili da se ova problematika, izmjenom zakona, treba što hitnije riješiti. Pored navedenih tema, UO je raspravljaо i o ostalim temama i problemima sa kojima se susreću metalna industrija.

## **Održana treća sjednica Ekonomsko-socijalnog vijeća za područje Zeničko-dobojskog kantona**

U sjedištu Vlade Zeničko-dobojskog kantona održana je 02. oktobra 2017. godine treća sjednica Ekonomsko-socijalnog vijeća za područje Zeničko-dobojskog kantona. Na sjednici je razmatran federalni Nacrt zakona o mirnom rješavanju radnih sporova radi upućivanja mišljenja na predloženi tekst u skupštinsku proceduru, te Inicijativa o izmjeni zakona o raspodjeli javnih prihoda u FBiH i Inicijativa aktiva direktora osnovnih i srednjih škola o promjeni ličnog dohotka.

Soicijalni parteri nisu dali primjedbe na Nacrt zakona o mirnom rješavanju radnih sporova, te je ESV jednoglasno donijelo zaključak da resorno ministarstvo na osnovu stavova zauzetih na drugoj sjendici sačini mišljenje koje će uputiti u skupštinsku proceduru.

Tokom diskusiji o Inicijativi za izmjenu Zakona o raspodjeli javnih prihoda u Federaciji BiH održana je prezentacija studija „Modaliteti raspodjele javnih prihoda u FBiH“ koju su sačinili eksperti sa Ekonomskog fakulteta Univerziteta u Zenici. Članovi ESV-a su podržali Inicijativu na način da osnova za izmjenu zakona budu zaključci iz studije, te su pozvali zastupnike svih nivoa vlasti sa područja

Zeničko-dobojskog kantona da daju podršku izmjeni pomenutog zakona.

U nastavku sjednice razmatrana je Inicijativa aktiva direktora osnovnih i srednjih škola o promjeni ličnog dohotka, pokrenuta na osnovu dopisa upućenog Udruženju poslodavaca Zeničko-dobojskog kantona kojim su problematizirali pitanje visine plaća direktora škola. Ekonomsko-socijalno vijeće je stava da se o pitanju plaća i drugih prava koja proističu iz radnog odnosa može pregovarati isključivo na nivou djelatnosti što je i zakonska obaveza, a nikako otvarati pojedinačne diskusije.

Nadalje, predstavnik Sindikata metalaca prezentovao je stanje u kojem se nalaze uposlenici preduzeća koja su u toku prošle i ove godine otišla pod stečaj, a iskazano je i alarmantno stanje u Željezari Zenica. Ekonomsko-socijalno vijeće zahtjeva veći i konkretniji angažman Vlade Federacije BiH kao vlasnika u rješavanju ovog problema.

## **UPFBiH organizuje javne rasprave o Zakonu o porezu na dobit, Zakonu o porezu na dohodak i Zakonu o doprinosima**

Polazeći od izraženih interesa za razmjenom mišljenja, primjedbi, informacija, te potrebe da se ukaže na važnost donošenja provodivih, fleksibilnih i optimalno prihvatljivih zakona, Udruženje poslodavaca FBiH, Privredna komora FBiH, Vijeće stranih investitora i Privredno udruženje predstavnštva njemačke privrede u BiH 26. oktobra 2017. godine organizuju **javnu raspravu o Zakonu o porezu na dohodak, Zakonu o doprinosima i Zakonu o porezu na dobit.**

Raspravaće se održati ***u oktobru i novembru 2017. godine u deset gradova Federacije Bosne i Hercegovine.***

Riječ je o vjerovatno najvažnijim zakonima za radnike i kompletну privredu u FBiH, te će na javnoj raspravi efekte primjene prijedloga navedenih zakona prezentirati predstavnici organizatora uz aktivno sudjelovanje predstavnika Ministarstva finansija FBiH, a kako bi se omogućila što šira uključenost zainteresovanih strana, očekuje se prisustvo oko 50 privrednika iz svakog kantona.

### **PREGLED JAVNIH RASPRAVA**

1. Gračanica, 24.10.2017., u 10:30 sati  
Multimedijalna sala Općine Gračanica
2. Tuzla, 24.10.2017., u 13:30 sati  
Plava kongresna dvorana BKC Tuzla
3. Bihać, 26.10.2017., u 11:00 sati  
Muzej Prvog zasjedanja AVNOJ-a Bihać
4. Tešanj, 31.10.2017., u 10:30 sati  
Kotekst Tešanj
5. Zenica, 31.10.2017., u 13:30 sati  
ArcelorMittal Zenica
6. Travnik, 02.11.2017., u 11:00 sati  
GS-TMT Travnik
7. Široki Brijeg, 07.11.2017., u 10:30 sati  
Feal Široki Brijeg
8. Mostar, 07.11.2017., u 13:30  
Privredna komora HNK Mostar
9. Goražde, 09.11.2017., u 11:00 Sati  
Konferencijska sala restorana „Drinska bašta“
10. Sarajevo, 13.11.2017., u 11:00  
Privredna komora FBiH

## Summit 100—Ekonomsko povezivanje regije

U glavnom gradu Makedonije, Skoplju, pod motom "Povezanost regije" 16. i 17. oktobra 2017. godine održao se šesti Samit 100, vodeća biznis inicijativa u regionu koja okuplja poslovne lidere Jugoistočne Evrope.



Samit 100 poslovnih lidera regiona jedinstvena je poslovna inicijativa u Jugoistočnoj Evropi, koja okuplja više od stotinu vodećih poslovnih lidera iz Slovenije, Hrvatske, Srbije, BiH, Crne Gore, Makedonije, Kosova i Albanije te omogućava intenzivan razgovor o preuzimanju odgovornosti za čvršće povezivanje regiona kroz konkretne prijedloge unapređivanja privredne saradnje.

Prvog dana sudionici su imali priliku da razgovaraju o značaju povezivanja u regiji, razvoju elektrifikacije, slobodnom kretanju robe i usluga i o tome kako lokalne ideje mogu dostići globalni uspjeh. Također, predstavljene

su ideje i projekti za unaprjeđenje saradnje unutar SEE regije.

Drugog dana sudionici Samita 100 učestvovali su u pet kreativnih radionica, na temu energetike, ekonomije znanja, brendiranja proizvoda u sektoru hrane i pića, te digitalne agende i turzima. Drugog dana održan je i politički panel premijera iz regije, na kojem su dati osvrti na regionalni „dogovor za novo doba“, u skladu sa sloganom Samita 100.



Zajednički projekti zemalja regije te komunikacijska povezanost (politička, transportna, kulturna i svaka druga) osnovi su preduvjeti za brži razvoj privrede zemalja regije, rečeno je na premijerskom panelu.

- Međusobna saradnja političkih lidera zemalja regije mora biti na vrhu prioriteta svih naših vlada. Moramo omogućiti brži protok robe,

Ijudi i kapitala kako bismo osigurali brži rast privreda - kazao je predsjedavajući Vijeća ministara Bosne i Hercegovine Denis Zvizdić.

Poručio je kako se ne treba bojati povezivanja i bliže privredne saradnje zemalja u jugoistočnoj Europi.

- Ekonomsko povezivanje regije nema nikakve veze s individualnim putem svake zemlje ka europskim integracijama. Ako otvorimo put reformskim procesima doći će i investicije i nova radna mjesta i onda možemo reći da smo napravili dobar posao - kazao je Zvizdić.

Predsjedavajući Vijeća ministara BiH kazao je kako u posljednje vrijeme ohrabruju makroekonomski pokazatelji.

Ocijenio je kako je obim vanjskotrgovinske razmjene zemalja CEFTA-e značajno povećan, a u prvih šest mjeseci ove godine BiH bilježi rast izvoza od 17 posto.

Ono na što se zemlje regije, također, moraju fokusirati je reforma obrazovanja i stvaranje društava znanja, kazao je Zvizdić, a s njim se složio i crnogorski premjer Duško Marković, istaknuvši kako je Crna Gora ozbiljno krenula u sveobuhvatnu reformu svog obrazovnog sistema.

Albanski premijer Edi Rama je kazao kako je jedan od ključnih problema kojima se čelnici



zemalja trebaju pozabaviti uklanjanje carinskih barijera koje izravno nanose velike gubitke privrednicima iz svih zemalja.

Makedonski premijer Zoran Zaev smatra kako je osnovna zadaća svakog političara osiguravanje uvjeta za bolji život građana.

- Ako želimo poboljšati standard građana u cijeloj regiji i približiti ga standardu građana zapadne Evrope moramo poboljšati poslovnu atmosferu u našim zemljama, a to ćemo puno lakše uraditi ako međusobno sarađujemo - istaknuo je makedonski premijer.

Organizatori ovogodišnjeg samita koji se održava u makedonskoj prijestolnici su Alkaloid Skopje, Bosna Bank International (BBI), ASA Group, Atlas Foundation, Hrvatska udruga poslodavaca, Srpska asocijacija menadžera i Združenje Manager iz Slovenije.



# NoLimit Premium

**Premium** korisnici zaslužuju **premium** paket...

Neograničen mobilni internet \*

Neograničeni razgovori \*

Neograničeno slanje SMS poruka prema svim mrežama u BiH \*

**Svi telefoni iz ponude BH Telekoma za samo 1 KM**

Mjesečna pretplata iznosi 170 KM sa PDV.

\* korištenje po fer principu (**30 GB** mobilnog interneta po maksimalno mogućoj brzini prijenosa, **5.000 minuta** razgovora unutar mobilne i fiksne mreže BH Telekoma, **1.000 minuta** razgovora prema drugim fiksnim i mobilnim mrežama u BiH, **1000 SMS poruka** prema mobilnoj i fiksnoj mreži BH Telekoma, kao i drugim mobilnim mrežama u BiH).



Dajemo više  
[www.bhtelecom.ba](http://www.bhtelecom.ba)





---

**UDRUŽENJE POSLODAVACA FBiH**

**MULA MUSTAFE BAŠESKIJE 12/3, 71 000 SARAJEVO**

**TEL: 00 387 264 830**

**FAX: 00 387 33 552 461**

**MAIL: [info@upfbih.ba](mailto:info@upfbih.ba)**

**WEB: [www.upfbih.ba](http://www.upfbih.ba)**